



Даймахке сатийсар

Чурт санна лаятта со Г1ум-Азин арахь,
Тянь-Шанан лаьмнашка б1аьрг тоьхча, кийрахь
Генарчу Даймехкан сурт х1оттало,
Малх бузе мел хьийжи дог 1ийжадо. } 2 раза

Малх, буза бегийна, рег1а лахбелча,
Суйре а, даш хилла, сайна язъелча,
Ойлане дарц даьлла со араваьлча,
Даймахка вуссу со, йа Везан Дела. } 2 раза

Берахь со хьийзинчу даккъашка вуссий,
Лаьмнашка, арешка сирла б1аьрг кхуссий,
Кхоблинчу б1аьргашка мела хи дуссий,
Даймехке хьобжу со, йа Везан Дела. } 2 раза

Тезетахь техкаш го вайн бошмаш, хьаннаш,
Г1айг1анах дуьзна ду тог1енаш, 1аннаш,
Дайн кешнаш доьхначохь упханийн аннаш
Хьулдан да воцуш го, йа Везан Дела. } 2 раза

Вай дина ярташ го тишьелла, г1ийла,
Го сирла шовданаш дай боцуш мийла,
Вайн хьомсар ков-керташ каш санна шийла,
Сов ирча карайо, йа Везан Дела. } 2 раза

Т1аккха со, дог духий, аьрцнашка волу,
1ийжачу кийрара мохь-ц1ог1а долу,
Яьссачу тог1еша соьца мохь олу,
1адавой воьрзу со, йа Везан Дела. } 2 раза